



Komunikadu Imprensa 26 Feveiru 2021

JSMP realiza Treinamentu kona-ba demokrásia, asesu ba justisa no liberdade asesu ba informasaun iha Suku Uma Ana Ico, Munisípiu Baukau

Iha 18 Feveiru 2021, JSMP realiza treinamentu ba membru konsellu suku no comunidade feto iha Suku Uma Ana Ico, Postu Administrativu Venilale, Munisípiu Baukau kona-ba “Demokrásia no kna’ar órgaun soberanu, partisipasaun públika iha prosesu halo lei no asesu ba justisa formál iha Timor- Leste.

Partisipante sira ne’ebé partisipa iha treinamentu ne’e hamutuk ema na’in 20 kompostu hosi feto nain 15 no mane 5, inklui membru comunidade defisiénsia feto na’in ida.

Treinamentu ne’e ho objetivu atu hasa’e koñesimentu membru konsellu suku no membru comunidade feto ne’ebé iha influénsia iha comunidade kona-ba demokrásia, kna’ar órgaun soberanu, públika nia partisipasaun, asesu ba justisa formal inklui hatene sira nia direitu kona-ba liberdade atu asesu ba informasaun.

“JSMP hanoin katak liuhusi treinamentu refere, hanesan meu ida atu hasae koñesimentu partisipante sira hanesan estrutura suku no maluk feto sira kona-ba demokrásia, prosesu halo lei, asesu ba justisa no liberdade asesu ba informasaun ka oinsa sidadaun uza sira nia direitu atu husu no simu informasaun sira ho loloos husi orgaun estadu,” dehan Diretora Ezekutiva JSMP, Sra. Ana Paula Marçal

Materia treinamentu ne’e fahe ba sesaun sira hanesan sesaun kona-ba demokrásia, kna’ar orgaun soberanu, Sesaun tuir mai kona-ba asesu ba justisa formál iha Timor-Leste, inklui kna’ar Juis, Prokuradór, Defensór Públika, Advogadu Privadu no Polísia no sesaun ikus kona-ba liberdade asesu ba informasaun.

Iha kada sesaun, iha tempu ba partisipante sira hodi husu, halo komentáriu no hato’o sira ninia preokupasaun. Iha sesaun kona-ba demokrásia nian, partisipante sira halo pergunta no hato’o sira ninia preokupasaun relasiona ho sistema politika ne’ebé akontese iha rai laran, oinsa JSMP nia haree kona-ba orgaun soberanu balu ne’ebé kontra hela Lei no Konstitusaun.

Iha sesaun asesu ba justisa nian, kestaun ne’ebé comunidade sira foti mak kona-ba atuaun membru polísia nian ne’ebé sempre ho violénsia no mós oinsa atu prosesu kazu abandona labarik sira, preokupasaun seluk mak oinsa atu trata dokumentus ba labarik ne’ebé la moris iha kazamentu nia laran.

Hatan ba preokupasaun sira ne'e JSMP responde katak, JSMP hanesan organizasaun independente ne'ebé la inkliña ba partidu ida no asuntu ne'e sai mós hanesan preokupasaun JSMP nian no agora dadaun JSMP halo hela analiza kona-ba mekanizmu garantia konstituisaun.

Kona-ba kestaun atusaun membru polisia nian ne'ebé sempre ho violénsia JSMP esplika katak, bainhira comunidade sira haree atusaun hanesan ne'e husi polisia bele ba hato'o keixa iha polisia ou bele mós direktamente ba hato'o keixa iha ministériu públiku ne'ebé hanesan na'in ba asaun penál. Enkuantu kona-ba prosesu ba kazu abandona JSMP esplika dokumentu sira ne'ebé presiza iha hodi hatama asaun ejersisiu poder paternál kontra inan ho aman.

Hatan pergunta kona-ba trata dokumentus ba labarik ne'ebé la moris iha kazamentu nia laran, JSMP esplika katak artigu 18 Konstituisaun alinea b no c hateten katak labarik sira hetan direitu hotu-hotu ne'ebé mundu rekoñese, hanesan direitu sira-ne'ebé hakerek ona iha konvensaun internasionál, ne'ebé Estadu ratifika ona. Tanba ne'e labarik hotu-hotu moris iha kazamentu nia laran ka lae, iha direitu hanesan kona-ba protesasaun sosiál, nune'e labele halo deskriminasaun ba labarik sira ne'ebé la moris iha kazamentu nia laran.

Xefe Suku Interinu, Sr. Antonino da Costa iha ninia intervensaun haktuir katak nia parte agradese tebes ba JSMP tanba bele fó prioridade mós ba sira nia suku Uma Ana Ico hodi fasilita formasaun liga ho informasaun importante sira ne'e ba comunidade liu-liu ba sira nu'udar membru konsellu suku hodi aumenta sira ninia koñesimentu liga ho asuntu demokrásia, justisa formal no liberdade asesu ba informasaun. Xefe suku hatutan katak sira sei fahe tutan informasaun sira ba comunidade ne'ebé la partisipa iha treinamentu ne'e, tanba informasaun ne'ebé JSMP fó útil tebes ba sira no durante ne'e sira nia koñesimentu menus tebes.

Iha enseramentu, JSMP ho Xefe suku husu ba partisipante sira atu hatutan tan informasaun hirak ne'ebé sira hetan ba membru comunidade sira ne'ebé la marka prezensa iha treinamentu ne'e, nune'e informasaun sira ne'e bele to'o ba ema hotu-hotu iha suku Uma Ana Ico.

JSMP observa katak partisipante sira hatudu interese atu partisipa iha treinamentu ne'e tanba partisipante sira maioria foin mak primeiravés hetan oportunidade atu tuir treinamentu ho tópiku refere.

Atividade treinamentu ne'e, realiza ho fundus husi União Europeia, parseiru suporta husi CEPAD no treinamentu ne'e realiza husi JSMP.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Email: ana@jsmp.tl
Telefóne: 3323883 | 77040735
Website: <http://jsmp.tl>